

Wo wobě cyrkwi šło

Wulke struktury angažement ludźi na městnje dospołnje lemja

Njebjelčicy (SN/JaW). Serbska ewangeliska kaž tež katolska cyrkej stejtej před poměrnje jenakimi čezemi. To wujewi njedawna rozmołwa dostojnikow wobeju cyrkwjow ze zapóslancow Serbskeho sejma w Njebjelčicach.

Kaž Serbski sejm w nowinskej zdžělenje informuje, staj so zastupnikaj Serbskeho sejma Tomaš Čornak a Měrćin Krawc z Hodźijskim fararjom, přichodnym serbskim superintendentom Christophom Rummelom, a Njebjelčanskim wosadnym fararjom Michałom Nawku k dźělowej rozmołwje zešto. W srjedźišću stejachu planowane strukturne reformy we woběmaj wulkimaj cyrkwjowmaj, kotraž potrjehja tež serbskich wěriwych w Hornjej Łužicy.

Z rozmołwy wuchadžeše po podacach sejmarjow nadźija, zo „móhli fararjow a člonow cyrkwinskih radow podpěrać při pytanju za argumentami, kak rozbiću serbskeho žiwjenja we woběmaj cyrkwjowmaj zadžěwać“. Tež Serbski sejm chce so

za to zasadžeć. Zdobom chcedža cyrkwinske wyšnosće na „jednym boku na historisku zamołwitosć wobeju cyrkwjow serbskemu ludej napřečo skedźbnić, na tamnym boku chcedža pokazać na nazhonjenja komunow, w kotrychž so po 30 lětach centralizacije myslenje tuchwilu měnja“. Načaloj staj Čornak a Krawc dale temu nowe sakske koalicijske zrěčenje, w kotrymž „mjez druhim tež prócowanja za sobupostajowanjom a swójskej zamołwitosću wjesnych gmejnow a wsow samych zaso do srjedźišća stajaja a z kotrymiž chcedža zmylki zašłosće skónčnje sporjedžeć“.

Přezjedni sej přitomni běchu, zo wakuum, nastawacy ze zhubjenja domizny a identity na wsach a gmejnach a přez hromaduwjedženje do wulkich struktur, „jenož angažement ludźi na městnje dospołnje njelema, ale móže samo sympatije za nowe a strašne identitarne hibanja budzić. Tomu měła wša towaršnosć znapřećiwić“. Konkrétne rozmy-

slowanja abo namjety, kak chcyli to docpěć, rozmołwni partnerojo njezdžělichu.

Argumenty přeciwo hromadukładženju wosadow – ewangelskich kaž katolskich – kaž tež přeciwo přirjadowanju serbskich cyrkwinskih gmejnow wjetšim němskim, kotraž su sej w Njebjelčicach wuměnili, posrědkuja ručež móžno woběmaj zamołwitymaj biskopomaj. To wobkrući na naprašowanje zapóslanc Serbskeho sejma Tomaš Čornak. „Najpozdžišo pónđzelu listaj wotpósćełemy“, wón našemu wječornikej rjekny.

Pozadk zetkanja bě, zo mnozy serbscy ewangelscy wěriwi wotmysl, wosadže Hodźij a Biskopicy zjednočić, chětro kritisce widža. Runje tak kritisce wobhladuja mnozy serbscy katolscy duchowni kaž tež wěriwi plany Drježdžansko-Mišnjanskeho biskopstwa, wutworić jeničku serbsku wulku wosadu. Wo tym w serbskim pastoralnym rumje hižo wjacore lěta horco diskutuja.